

小倉山房詩集

小倉山房詩集卷十四

戊寅

錢唐袁枚子才

答髯孟人日見懷

青龍在戊巳七日天漏不止風絲絲東皇太乙行舊雨
緝孟太守貽新詩山人閉門無一事得詩大喜親歌之
音豪調逸趨慢紫義和敲石鳴玻璃人口留人記往歲
朱雲徐樂多文詞草衣君家夫人湯龜坐安成之食供
晨炊一朝風輪蕩陳迹二老委化相參差撫時感事兩
眼濕春縱不語能無悲春晴便覺百花迫故意風冷凋
青枝譬如嫁女已筮日往往事阻佳期遲先生甥館漸
郎以疾未婚
之故調惟有老梅解春意凌風犯雪揚幽姿苦恨主人不

飲酒玉樹照影無金卮且含數花若有待待我報與先生知

余十二歲舉秀才鄉人榮之杭州信來韓錫舉如其年喜贈以詩

冬郎雛鳳作新聲啼出桐山第二清漢試韶書童子少唐多科目秀才榮膠庠舊夢吾能憶宅相高風汝竟成三十年來佳話在老夫悲喜若爲情

送四妹雲扶子歸揚州

江城春暮水漫漫送汝揚州作季蘭十日新婚隨婿別二分明月待誰看貧家奩贈新詩好世上賢名後母難

妹繼配汪氏記取張華笈女史莫教離恨目波瀾

秦樓挽手正登臨底事雙飛去不禁族大爭看新婦貌
夫憐暗慰阿兄心嘔啞江上三更榜安穩沙灘兩睡禽
早采瓊花寄芳訊舉家翹首白雲深

贈微凡上人

上人姓戴吳中江雨峯客也庚午寓江家相識
今來白下云江氏一家暴亡感而薙髮

老友變爲僧升堂一見驚滄桑方欲說涕淚已沾纓帶
雨袈裟重披風貝葉輕儒門原淡泊留不住先生
共記江家住星霜未十年笙歌猶在耳父子竟重泉有
恨難詢佛無歸易入禪今宵掃塵榻且自證前緣

雨中見渡江者

春雨如絲織不清春風料峭可憐生山中尚要關門住
江上爭禁喚渡行

二月十二日

梨初綻柳初嬌二月春寒雪尚飄除却女兒誰記得
百花生日是今朝

寄蔣茗生太史并序

壬申春過揚州見僧壁題詩絕佳末有茗生二字
遍訪無知者熊滌齋前輩爲言茗生姓蔣名
士銓江西才子也因得芳諷詢余詞曲尤多今
年入翰林作詩寄之

葦蕤花開月二分揚州壁上最憐君應劉才調生同世

嵇呂交情隔暮雲大禮賦成南內獻清商歌滿六宮聞
爲他蕭寺題詩者曾犯紗籠手自熏

回首蓬萊廿載遙喜聞詞客續金貂雲仙舊夢都陳迹
才子新詩正早朝江上書來三度雁青山人老一枝簫
何當置酒旗亭雪乞與吳趨送晚潮

哭王孟亭太守

難遣巫陽叩帝閭生芻一束酒盈尊故鄉采麥成長往
旅館遺孤尚候門粉壁未乾題了墨江風應送欲歸魂
編年詩放靈床上待我重泉再細論

意氣公然盛孝章三朝鶴髮老名場虞歌醒我千年夢
舊雨添君一笛霜卜宅臨江悲庾信養生空論笑嵇康

青溪風月從今冷無數梧桐變白楊

王學熊經鳥伸之說故有第六句

投尹六公子似村

陵陽有瓊樹密葉含青蔥繁枝八九條披拂蕊珠宮其
六尤娟娟與香蘭同柔心媚君子露眼啼春風三日
不相見芳訊誰能通賴有青鸞鳥傳書出烟中蠶眠字
數行素手贈芙蓉上言銘金石下言託始終

隋唐秀才科尊乃無與比不待金馬門便領尚書使叔
季稍陵夷蕭艾雜芳芷吾皇重人才赫然降玉旨

大開明光宮徧試羣公子曳白愁張奭聲鳴悲侯喜六
郎獨不然奮臂書黃紙漢策貫天人唐詩協宮徵君
王笑而言自有真才耳歸銅肘後印四字千古美曰殿

試秀才佳話從汝始

我年如郎小初拜老尚書忽忽二十年郎年復我如尚
書廳旌旄四度江南車先生今鶴髮弟子亦蒼鬚惟有
諸郎君玉佩而瓊琚春華良可愛努力翔天衢歲星常
周天三吳豈久居君如上林花我如烟江魚青雲日以
密白雲日以疎殷勤復殷勤一字一真珠毋忘書中言
棄置在須臾

余春秋四十有三尚抱鄧攸之戚今年六月二十
九日陸姬生男不舉

半日爲人父三生事可嗟如何投玉燕忽又隱曇花壯
髮初離母長眉頗類翁木皮棺紙薄裊汝送泥沙

漫說胞衣紫莊公偏寤生來時卽去路泡影度風聲碧
海珠何脆桐花鳳不鳴親朋爭問信流恨滿江城
小草留根易瓊花度種難琴從中散絕書付左芬看文
葆衣空製瑋聲聽已殘斜陽雖自好無補膝前寒
老母含愁坐殷勤作慰詞道孫生有日恐我見無期此
語何堪聽全家一味悲蒼天與人隔何處問靈龜

書所見

萬物赴生意不能無所求麟鳳至蟻虱亦各有營謀爲
佛爲仙者刺刺尚不休何況侵晨鳥能不鳴啾啾我飢
亦思食我寒亦思裘不謀固不可太謀亦徒憂適可而
止耳如水行輕舟

深夜不熟睡早起顏色焦嚴冬不肅殺草木春蕭蕭人
老而不死母乃夜行勞神仙作狡獪千年爲一朝畢竟
當長夜獨醒亦無聊不如信天翁大化隨波濤

呂布嚴酒禁符堅拒婦言頗遵先王訓而以亡其身要
知天下事圓通理萬千何以稱英雄識以領其先

我昨乘舟行順逆風有權我今靜掩戶有風無風然所
以王秀之久宦輒不肯相傳勇退人次神仙一等

賦詩似爲政焉得人人悅但須有我在不可事剽竊昔
有王家郎好學華子魚惟其太相同轉覺遠不如

臯夔非命達共驩非命窮唐虞一千年司命者無功宣
尼泣麒麟命始歸蒼穹吾官雖沉抑吾境猶從容日者

問支干一笑如耳聾欲知東方生惟有太王公

譙周

將軍被刺方豪日丞相身寒未暮年惟有譙周老難死
白頭抽筆寫降箋

周昌

遺孤共殉聞荀息越境能逃有正常何事黃羅負如意
但聞強相病朝堂

朱買臣

采薪歌罷雪花飄五十登朝氣轉豪殺得張湯刀筆吏
一行功已敵蕭曹

張禹

羽衛傳呼謁太師九重請訓萬人知先生開口君王拜
床上深深托女兒

叔孫通

軍謀休註漢官儀綿蕞荒郊事事非三代以還皇帝貴
兩生之後腐儒稀

朱栩

人各千秋有性情不圖禍福不圖名金丸冷落椒風斷
偏葬當年董聖卿

王儉

散髮斜簪侍玉除金鑾殿上酒酣餘拍張琴舞琵琶外
別有臣歌封禪書

范希文

黃閣風裁第一清
宋朝名相半書生
西邊經畧成何事
尚勸橫渠莫論兵

陶宏景

樓上三層道氣濃
永明求祿枉匆匆
先生綠髮方瞳意
可在烏紗骨相中

郝詵

射策明光第一人
歸來香案筆當門
一十年後兒孫記
要報龍鬚老友恩

沈約

老去名場夢久消
青宮風雨隔前朝
內家尚識東陽客

白髮淋浪淚萬條

謝景仁

絃絕清商螽餌絲人才國運兩相支景仁三十居郎位
司馬家兒事可知

王僧孺

賣紗東海遇中丞兒墜深溝母亦曾兒作中丞母何在
鳴騶引道淚難勝

病中作有序

余病中每夢得奇句醒輒忘之今年疔作熱甚
似有霞帔者持紙求詩余書萬樹接天風掃海
一人手結虹霓帶云云其結句云瑤妃浴罷天

河窄熱退僅憶此三句似非人間語爲足成之
萬樹接天風掃海一人手結虹霓帶黃金梯滑升天行
鳳凰挽臂星辰迎風袞飄飄拜玉宇口含北斗與天語
天上美人半故人素手拈花相爾汝王母微笑不掉頭
癡龍小謫三千秋雲窗奏事不甚解畧問海水西南流
宮漏蓁蓁天鼓急金輪影逼扶桑直三十六宮珍珠明
瑤妃浴罷天河窄

鬬蟋蟀三十韻

兒時不好弄雅好鬬秋蛩老至興不淺率衆時相攻憑
軾觀壁上擊節鼓胡隴選材必大閱焚山輒搜窮得一
巨擘焉文竄以爲宮樹之蜚弧旗築壇招羣雄教戰如

峻訟持草開金籠其始體卑伏拘怒初興戎徐徐脰低
昂霜刃將交鋒牙摩疑契瑜頭觸愁共工彌明舉足踈
叔孫當喉拊道險一與一兩將鬪奔中伏已墮其腦搏
磨斂交胸銜枚悄無聲運翼如有風瑟瑟齒擊響拂拂
長鬚衝微覺昆喙息愈增羅鉗兇射肩猶能軍傷股強
鳴鏃一擲出盆外如喝泉盧紅再戰不改期如學楚子
重摩壘更靡旌逐北如飛蓬帶斷徇于軍勇哉氣矜隆
奏凱唱饒歌鼓翅如金鐘漢有蟲將軍母乃汝同宗敬
汝矜而爭比黨非螭螭愛汝勇而仁螫人非莽蜂飲汝
以勇爵螭螭慚尸喪偶汝以新牡字微聲雍雍十月入
床下懶婦驚殘夢寄語若族氏杜鞠休熏烘我續蠅虱

傳自笑本雕蟲

偶成

事往百慮忘興來一杯執莫道勸無人青山酒邊立

遣懷

勸駕已無中執法起家曾作侍中郎不先詣客來還答
最愛看書過亦忘畎畝身閒供疾病功名事變入文章
較量六代風騷者可是南朝顧野王

才人已嫁邯鄲卒名士誰當曳落河出世風懷蝴蝶夢
傷春心事鴈鵲歌聰明得福人間少僥倖成名史上多
簾外芙蓉好顏色晚秋寂寞照金波

兩鬢霜侵百慮空願書箋奏與天公傳名早死皆高壽

肯樂貧家卽富翁執筆羅喉如上馬用心蘇綽本張弓
行藏此日憑誰問欲倚黃香賦九宮

病起對月

才卸藤床出戶前舉家驚瘦老親憐無秋不病中年後
有酒重歌碧月天燈寫黃花霜下影風留紅樹晚來烟
主人小與青山別觸目清光更宛然

客至

剝啄柴門響呼僮掃葉迎涼蟬知讓客且住一聲鳴

侍宮保遊棲霞作

偶見先生開病眼教陪公子看秋山來修勝景官俱集
去請 鑾輿表正還小雪晴多冬更暖寒林霜重葉全

斑嫦娥似解雲仙會徹夜清光水石間

說到棲霞喜不勝尚書前世此山僧引來瀑布分三處

陡闢奇峯遠一層元老獨操風月主羣公齊獻匠心能

宮門管掃閒花者尚有詩人王右丞

江寧丞王右丞有宮階掃帚掃閒花

之句

屈指奇觀數未窮就中最勝是行宮兩松收立黃門

外萬嶺橫陳紫閣東山似人才搜更出水如膏澤轉常

通知公不厭閒遊客一个狂夫履獨紅

從官皆鞞而枚獨朱履

同來不肯同歸去遊味從頭再細嘗山好全憑松色古

春回還盼水聲長亭臺分寸無虛設物力東南幸莫忘

休怪曲終仍奏雅打禾民正滿殘陽

余雅不喜次韻疊韵而宮保寄詩勸之不得已再

獻四章

尚書抱負何嘗展展盡經綸在此山一自風泉歸藻鑑
幾番畫戟帶雲還高峯未到亭先見古廟經秋草盡斑
同入江城將十日吟魂猶繞翠微間

看山立雪兩難勝隱者真如退院僧掃地松花堪滿掬
倚闌紅葉正千層石從偶得時憐巧泉竟搜來自覺能
蒙把烟雲付才子春華終恐愧家丞

公來札云揮酒烟雲固當讓諸才子

石梁精舍望無窮欲取長江入帝宮四面仙雲生戶
牖六朝碑塔半西東斜陽善寫蒼松影春雨能教絕壑
通回首師恩與山色霜燈不負兩宵紅

小集山房
卷一
三
疊韻詩如岩疊浪寄來雅味教深嘗山無官鼓更尤永
伴有郎君話倍長 王輦尚遲三歲至松雲何敢一朝
忘書中苦訂重遊約會待梅花報曉陽

揚州轉運盧雅雨先生招遊紅橋集三賢祠賦詩
微雨不成雪曉日明紅橋轉運盧大夫折柬相招邀艤
舟傍采陌稅駕登烟皐舊雨一樓滿新霜千林消半席
迎王粲終席來孝標王徵士藻劉侍講星緯宏正金蘭簿謝瞻雲
霞交缺面或十年抗手竟一朝繁星托孤月東海滙羣
潮非公扶大雅我輩何由遭

皇宋三賢臣高風不可再迢迢五百年此事如有待我
公領平山辦香寸心在懷古此山中招隱此山外篠簜

千琅玕道是程公園

千橋太史

程公有遺命拾宅爲阿蘭公

改祠三賢亭臺增舊觀既使故人慰復使先賢安時時
攜酒人處處憑闌干羣公且莫飲賤子有所思三賢在
何處一賢今在茲

大江橫天表南流入建康其中有青鸞三年不來翔偶
然乘螺舟撫衣君子堂朱履從而後輕蓬卷微霜水流
旗蓋影風通松花香抗論至騷雅摩挲及圭璋烟帆歸
暮雲紅燈迎兩旁山高月猶小日短情何長強我盡一
杯爲公留數行平山有時傾此會無時忘

揚州對雪戲作

求官不過張伯松求財乃學劉伯龍酒未引人着勝地

雪先含笑語春風問雪何所笑笑我不固窮秦散三千
金羣士鬪未終張湯解此意田甲與錢通賈生太將牢
繡衣譏賣僅天下要物戰國策南朝經國劉係宗汝皆
不知猶夢夢妄思弋獲如飛蟲可曾鮮卑語熟琵琶工
汝何不學漢賢良請除鹽鐵追虞唐又何不學張平叔
請去商人正國俗胡爲乎箕子不知長夜飲禹王且解
下裳行騎來仙鶴到處舞心鉤意釣若有情我道雪莫
笑生財有大道西施東施同一顰存乎其人分醜好孟
軻兼金受七十寧與蘇秦較多少我且招阿堵喚青蚨
天下英雄子與吾子之俗處須我沈我之雅處須子扶
人仕子求高官吾仗子求異書子爲人呼盧子爲我提

壺不爲風花米竹來用子便使文史元儒笑且呼不爲
璣琥盤匱來用子便使金童玉娥美且都天生萬物貴
用得其所耳守彼笨伯作虜胡爲乎錢神聞之手拍張
雪神聞之喜欲狂兩人悔過同商量共請女仙燒雪作
白蠟定教胡岳滿面生銀光

夜過金賢村明府卽席有作

揚州司寤許宵行夜踏新城進舊城一柱金筩兩行酒
有人剛唱淚盈盈

元官風貌似花嬌玉笛吹殘病未消生恐敬兒全體熱
教儂親手試瓊瑤

子野聞歌喚奈何盈盈方寸起星河要他步上蓮花怯

小製纏頭吉莫靴

程立萬贈靴元官嫌小

絲哀竹濫角聲殘雪滿前溪月滿山我本龍華同會客
愛吹尺八謫人間

送劉映榆侍講入都

征袍看拂九秋霜手採瓊花入建章遇我尚行前輩禮
因君轉憶少年場才高筆有東京賦官久舟無南越裝
劉督學同日尋春同鬪酒當初曾忝蔡中郎

投鄭板橋明府

鄭度三絕聞名久相見邗江意倍懽遇晚共憐雙鬢短
才難不覺九州寬君云天下雖紅橋酒影風燈亂山左
官聲竹馬寒底事謾傳坡老死費君老淚竟虛彈有誤

死者板橋大慟

讀藥下吟感贈半野園主人

主人劉姓字春池爲縑造計吏火焚其局凡家畜梨園樂器及所居閣亭盡償入官

讀君詩罷我神傷黃蘗春生味獨嘗有此高才甘小隱
無多老淚落清商尚衣局盡三更火協律郎餘兩髻霜
舞扇歌裙如解恨也隨東海嘆滄桑

名園前歲看花時爲訪姑蘇雨畫師照水那知風浪起
賣山翻羨子孫遲黃金放手來難再白雪彈琴聽者誰
惆悵英雄回首晚枕烟亭上負心期

推窗

連宵風雨惡蓬戶不輕開山似相思久推窗撲面來

陳古漁新婚

一卷文傳紀錦裙
纓纓夫婿久超羣
阮修婚費名流助
張祐才華女子聞
紅豆新詞南浦雨
海棠春夢板橋雲
匏瓜無匹今休感
已覓元霜見少君

標梅休註鄭康成
春晚花遲最有情
貧士家原須健婦
高人妻亦喚先生
承歡聽唱姑恩曲
擇木看飛谷口鶯
古漁成從此蘆簾燈似雪
吟詩一定是雙聲

除夕雪宮保饋魚

對雪公憐把釣難
特教雙鯉贈魚盤
烹鮮厨下年將盡
燒尾龍門夢未闌
入戶似傳春信到
揚鬚猶帶浪花寒
披裘再拜烟波外
一物還供兩歲餐

除夕過李竹溪明府

符雪尋君雪滿身
屠蘇臘酒正橫陳
光陰最貴是除夕
宦海相關惟故人
妾傳公被劾
方物盈門爭賀歲
小胥裁帖寫宜春
喧喧士女蓼蓼鼓一路花燈歲已新

鉗鬚

我昔留鬚曾有詩
今年鬚白復鉗之
昔求其無今求黑
十六年來能幾時
終朝攬鏡不停手
田彼南山如去莠
衰草當秋豈盡除
素絲雖染知難久
白鬚臨行慙然訴
道君逐客真無故
拔毛與世旣無利
吹毛於我又何惡
昔我在周朝
燕毛首坐何尊高
又嘗親遇宋襄公
不敢見禽稱戰功
於今骨肉連理生
忽然離別鴻毛輕
黑白

太分古所戒，虛老榮幼難。爲情主人笑，且言我本路。豚
君自從諸毛來，紅顏變青春。意雖不樂強，自解英雄從
古鬚。眉開汝又一朝變，微雪使我萬念成。輕雲君不見，
天公作春秋。落花從容自去留，人生老少無痕迹。大家
夢夢登糟邱，汝偏標題衰頽不忌諱。使我臨水顧影心，
驚愁美不能鬪百草。健不能挂雕弓，旣不知何日爲人
作。曾祖又不知全白可能參，相公不如有心媚側室。掃
除枯槁留青蔥，誓不許汝先縞。紫星星滿把，揮春風。

小倉山房詩集卷十五

已卯

錢唐袁枚子才

予才子歌示莊念農

予才子願而長夢東筆萬枝爲桴浮大江從此文思日
汪洋十二舉茂才二十試明光廿三登鄉薦廿四貢玉
堂爾時意氣凌八表海水未許人窺量自期必管樂致
主必堯湯強學佞盧字誤書靈寶章改官江南學趨蹌
一部循吏傳甘苦能親嘗至今野老淚簌簌頗道我比
他人強投幘大笑善刀而戔歌招隱唱迷陽此中有深
意曉人難具詳天爲安排看花處清涼山色連小倉一
住一十有一年蕭然忘故鄉不嗜音不舉觴不覽佛書

不求仙方不知青鳥經幾卷不知樗蒲齒幾行此外風
花水竹無不好搜羅雞碑雀錄盈東箱率鄂君衣聘邯
鄲倡長劍陸離古玉丁當藏書三萬卷卷卷加丹黃栽
花一千枝枝枝有色香六經雖讀不全信勘斷姬孔追
微茫眼光到處筆舌奮書中鬼泣鬼舞三千場北九邊
南三湘向禽五嶽遊買生萬言書平生耿耿羅心腸一
笑不中用兩鬢含輕霜不如自家娛樂敲宮商駢文追
六朝散文絕三唐不甚喜宋人雙眸不盼兩廡旁惟有
歌詩偶取將或吹玉女簫綿瀉聲悠揚或披九霞帔白
雲道士裝或提三軍行古塞碧天秋老吹甘涼或拔鯨
牙敲龍角齒牙閃爍流電光發言要教玉皇笑搖筆能

使風雷忙出世天馬來西極入山麒麟下大荒生如此
人不傳後定知此意非穹蒼就使仲尼來東魯大禹出
西羌必不呼子才子爲今之狂旣自歌還自贈終不知
千秋萬世後與李杜韓蘇誰韻韻大書一紙問蒙莊

正月二十二日紀事

尚書公餘發幽想新歲不見詩人往顧命材官召某來
白雲可覓人難訪點也絃歌聲正希聞呼身作輕鷗飛
後堂直入無絲竹絳帳一枝紅蠟燭初將古玉辨琳琅
繼取蟲魚別印章吟詩風戛幽窗竹論史秋生舌底霜
野人看書如看水眼光到處狂言起當仁不肯讓先生
狂狷惟聞裁小子五歲郎君出款賓三千弟子幾人存

重提知遇當年事，愈覺師生此日親。
官鼓鼙，星欲曙，山人長揖還山去。
送客燈明，使者衣回頭，月照將軍樹。
臨行雙贈紫羅囊，爛似天孫雲錦裳。
此意明公應有在，教儂佳句好收藏。

答周幔亭山中招友一篇

兩山屹相向，中有兩賢居。
兩賢時相招，歌呼相唱喁。
一賢幔亭子，昂昂千里駒。
能畫周天星，帝座通嶺呼。
能測長江線，胸中橫具區。
執削道所記，義農黃唐虞。
苦布偏褰衣，鉢冠弁機車。
筆宅賦因山，清涼割一隅。
一賢隱隨園，玉佩而瓊珪。
挂冠十二年，栽花三千株。
所居小倉嶺，赤壤雜塿坻。
胎於清涼，其氣廉以疏。
兩山無兩賢，岌

炭徒清虛兩賢無兩山兀兀空蓬廬而今旣雙得彼此
相夸譽我負子則戴子耕我則鋤雪海我已足松濤子
有餘淳于飲一石孟公飲一盃酒戶無大小醉鄉有乘
除此外來諸賢招之相與俱徐淑工丹青蝴蝶夢蓬蓬
黃香賦九宮文史爲嬉娛王淪汝芳隣詩律追唐儒獲
齋我從昆仙履鳴雙鳬如山聚衆峯如水匯羣湖如樂
合宮商如蚩負驅驢琴彈左瑟應鶯立旁鷗趨招友得
此樂千金抵須臾僕乃掉頭笑如斯而已乎我請爲大
招與子相擲揄擊筑招漸離試劍招風胡挾彈招韓嫣
采桑招羅敷我若爲天公玉女常投壺我若爲宰相子
路執金吾我若大勳貴驅使霍家奴於今皆無分且自

招其徒不招漢灌夫酒氣太豪粗不招石季倫俗物矜
珊瑚不招袁彥道無賴喝梟盧所招皆目前一一與人
殊招月使升戶招風使當鑪招葉爲茵幄招竹掃行厨
禮從野人野谷號愚公愚牧童牛戴牛酒器觚不觚若
非歌纂纂定是唱烏烏有花皆九錫有賦必三都山對
人而態活水得主而難枯星聞歌而欲聚鳥結伴而鳴
舒各招所招客各著所著書子招我未有我招子亦無
若比淮南王招隱終何如

隨園張燈詞

隨園一夜闌燈光天上星河地上忙深訝梅花改顏色
萬枝清雪也紅粧

金粟分行綴玉蟲，淺紅相間又深紅。隔山人唱霓裳曲，笑指先生住月宮。

高下樓臺列錦屏，紅珠歷落水雲清。嫦娥似讓燈光佛，捧出銀盤不敢明。

熱戲俳歌火鳳謠，金缸銜璧影相交。引光奴逞擎雲手，遍摘春星挂樹梢。

盧仝吩咐小心風，珍重封姨護燭龍。一陣丁東鈴索響，水痕花影蕩千重。

誰倚銀屏坐首筵，三朝白髮老神仙。熊滌齋太史道看羊侃

金花燭此景依稀六十年。太史云年十五時舉京兆宴宛平相公怡園見張燈相似

今重赴鹿鳴矣

小集山房
客散華堂酒未收
重教金狄守更籌
簾波聽喚青衣捲
別有名花照影遊

紫明供奉漸婆娑
倦把青藜走絳河
笑我金蓮舊詞客
照花時少照書多

遊仙詩

當年足下看雲生
三疊琴心道已成
誤寫上清蝌蚪字
一篇真誥不分明

風引三山境寂寥
碧天吹斷水精簫
關心子晉顏如玉
身隔雲屏手亂招

迢迢白練耿秋河
織女垂來恨已多
八萬六千明月戶
不知何處認嫦娥

相招須把碧芙蓉海上歸來雪萬重同住玉真清冷地
不司符籙便從容

東海塵揚阿母家年來勾漏少丹砂有人手執青鸞尾
獨立蓬山掃落花

海棠詞

春花開到海棠枝天意來催艷體詩誰把嶸山萬重雪
盡貽兒女作胭脂

東風儘力送紅潮人自消魂雪自飄不信天孫織雲錦
年年都挂此花梢

聽得流鶯向曉催捲簾紫玉已成堆生愁夜半成烟去
自取銀燈照幾回

當年妃子鬪風華浴罷華清鬢小斜國色半酣紅玉軟
至今留影漾窗紗

我亦曾披宮錦行昏昏春睡不分明輸他花上金衣鳥
裹着紅雲過一生

九錫無人奏綠章自慚虛作紫薇郎夢中彩筆珍珠字
擬托朝雲寄數行

春日雜詩

千枝紅雨萬重烟畫出詩人得意天山上春雲如我懶
日高猶宿翠微巔

漠漠輕陰雨後看支筇長自倚闌干正嫌花氣無人送
一陣東風過玉蘭

水竹三分屋二分滿牆薜荔古苔紋全家雞犬分明在
世上遙看但綠雲

清明連日雨瀟瀟看送春痕上鵲巢明月有情還約我
夜來相見杏花梢

萋萋芳草遍春潭深院無人綠更酣何處一聲清磬響
斷峯西去有茅菴

玻璃作鏡當雲鋪返照春山入畫圖自憶頭銜揣風骨
此生只合住冰壺

鑿得雙湖似故鄉一枝柔櫓泛春航落花水上凌波立
還擬人看舊日粧

風亭月榭事匆匆園漸繁華我漸窮半世經綸十年俸

思量都在水雲中

袖拂孤雲理素琴那知門外落花深
人不飲河東酒只要君王賜茯苓

銀箏低按古涼州聽水聽風夜正幽
忽報樹梢燈似海小紅歌罷盡回頭

柴門掃雲雲不聞雲中置酒臨高臺
夕陽辭我下山去明日問渠來不來

自把新詩寫性情勝他絲竹譜春聲
流鶯啼罷先生唱各有閒愁訴不清

題曹麟書學士天下名山圖卽送其乞假歸里

八十七歲學士何處來方瞳綠鬢顏如孩
意欲吞盡齊

烟九點上天去故把名山幅幅都安排左手抱崑崙右
手拍洪崖使我一見心驚猜疑是夸娥之神負山至又
疑徐福之船從海回那知朱家爲兄劇孟弟當年雞壇
同歌長安街長安李夫子玉淵先生宏獎諸仙才夷門大會
教盤盤誰執牛耳升高臺君年最長我最少浮萍一聚
風吹閒人生轉眼如夢耳二十五年海水飛塵埃諸賢
晨星半錯落李公白骨紫蒿萊我亦清霜上頰久隱矣
君方長劍挂頤事玉階平生舞刀奪槩英雄志氣小差
未惟有朱玉登山臨水之心猶未灰潑烟墨寫雲雷五
丁捧筆萬靈磨崖不必穆滿長驅八神駿不必向平蹄
破雙麻鞋只須一頁展開處但見清都紫府眼前前崑

而崔巍青宮尚待桓榮駕曼倩難戀瑤池杯太公磻溪
方坐釣兩耳頗聞文王催前別既已遠後會何時偕但
問黃石公他年滄海騎鯨去可要北橋進履之孺子擔
簞相追陪

題碎琴上人集

一代編詩史寬收幾個斯人宗獨漉上人自稱獨流
派自南能賣卜簾垂市抄書佛借燈勸將狸德隱差免
十方憎

制府西園小修工畢遊後賦呈宮保

山事畢棲霞山公坐晚衙自安三品石小綴一庭花邱
壑憑心造烟巒愛客吟數拳猶未足採到野人家

不繫舟如舊亭臺事恰更添廊通雨路分竹散秋聲石
罅蒼松補窗虛碧瓦明公餘射鵬處楊葉與雲平
自寫爲山好新詩賦六章三江看雲物四度感滄桑水
靜游魚樂簾青夏日長鳴鳩隔花報春雨足新秧
我與西園柳蒙公種廿年自慚頭似雪不及樹參天相
隔才三里廣歌每數篇春風沂水意含顰向誰傳

宮保和詩

斜照映紅霞濃陰放柳衙山疑環几翠風颭隔簾花
大廈慚無補芳園詎足誇梁間雙燕子不認是誰家
亭臺猶似昨轉眼景全更石磴含雲氣蕉窗帶雨聲
松青鱗半老波漲鏡初明頗有才人意文無一筆平

老去詩情減相思有和章幽懷耽水石農事念蠶桑
竹影廂廊靜鶯啼午夢長栽花還意懶幾度問新秧
羨君生計好高卧自年年宦海渾無岸桃源別有天
琴書消永日雲物入新篇笑我舟難繫空留客舍傳

杭太史堇浦寄示嶺南集奉酬三十六韻

嶺海新詩至空山老鳳鳴焚香盟雙手展卷到三更
蜃氣青紅色鈞天雅頌聲傳經百粵地灑翰五羊城
南斗文星避西河滿席傾塗金誦漢塔呵手試端硯
樹寫黎臚義糕題鬼子名離宮開絳帳化雨沃仙壺
曉夢梅花落高談孔雀驚三千詩弟子六二古先生
陸賈歸裝富庚桑尸祝成豈徒娛暮景真足慰交情
憶昔公車召相

將殿上行采薇先輩引師律丈人貞德講資匡鼎噓枯
到補衡充宗冠嶽嶽郭憲氣觥觥夜訪蓬池月朝騎太
乙鯨隨月冰署冷分手玉堂清慷慨論封事寬容賴

聖明白衣辭領職短鋤許歸耕烏篆儂先誤龍鱗爾更
櫻三山成小謫一樣誤前程倭乞蕭夫子人師馬長卿
弓衣詩繡滿蹋臂女兒迎近海文瀾濶還家五兩輕珠
娘曾買否臯博幾輸贏五十喪無毀三虞事未營菰蘆
還薦士

時薦胡生
來白下

猿鶴豈忘盟感舊山陽笛藏書晏子

楹有人遊白下幾載滯歸旌鄉井離黃籍江東作步兵
書來風動竹別久柳啼鶯以我紅顏改知君鬢雪盈無
車難越弔望遠但沾纓想和軒轅律遙吹子晉笙蒼茫

千里月執訊代班荆

遣興

富春嚴子陵谷口鄭子真亦自懶惰耳心非有所嗔男
兒不作官豈遂無立身必求所以然定知非解人
人難作我兒我難作人父所以生不育皇天不輕與古
來真才人俎豆非兒女諸公莫相關我自有千古
貨殖子貢富饒牖原憲貧富乃勞其力貧則苦其身治
生貴有道行樂貴及辰自活苟無才何以活生民
荒山本無墻梅雨復來敗山居已十年盜賊尚無害瀾
上李將軍未必餘威在楚國舊令尹或者有遺愛
當時只望老以便好辭官此時只畏老以便常尋歡望

之怡已至畏之不能逃始知望與畏兩念俱徒勞
古人吾不服今人吾可知惟其去人遠執禮彌謙卑奕
棋貪有伴降心以相從應付吾手上高低吾心中
當年修隨園過溪事營造今年修隨園溪內日探討遠
修跋涉遙腹裏翻米了近修結構易亦復偃息好始悟
古諸侯封國不嫌小

話桑麻圖爲方綺庭明府題

東漢張君游驅騶漁陽道前村有桑麻顧之欣然笑先
生綰綬時與彼作同調風和柘樹陰雨晴麥隴初捐除
長官體輕乘奔梭車召彼野老詢桑麻今何如
桑者前致詞今春葉青青麻者前致詞漚菅得奇贏使

君未來時土化多未宜使君既來後大足多生釐使君
不嫌醜敢獻村中酒山妻急繫裙牧童忙鼓缶長跪問
使君見過唐堯否

使君忽心動我亦有桑麻汝旣安汝業吾亦憶吾家高
掛烏紗冠歸看白門花白門有一人種桑十年矣半樓
青溪雲滿徑桃花水若再欲話時請君來洗耳

偶題

春歸未歸雨復晴竹西牕戶風泠泠野薔薇喜没人到
雪白小花開一庭

香亭自徐州還白下將歸鄉試作詩送之

一別鬢如此全家怪汝蒼蒼桑生面目世事感星霜到

眼園亭換關心兒女長阿兄難免俗先要問歸囊
聖主崇詩教秋闈六韻加今年得科第比我更風華五
字清商脆三條畫燭斜相期呼小宋追步八磚花

去年書慰我作叔苦無因

香亭和余失子詩云薄福難爲叔添丁轉惱爺門戶

堪誰托芸香少後塵桂花兼子采荆樹及時春莫再生

才女能詩便嫁人

戲四妹

聞說新居勝柴門汝未開到時花繫馬飲處月當杯遊
子隣翁認高歌啼鳥猜多增棠棣館頭白我歸來

悼柳

水上古柳彎環如老龍余誅茅築岸理而出之

置亭焉顏曰柳谷不逾年柳死

受賞非君願相知愧我羸建亭流水上從此好春無古
幹寧辭伐殘枝強欲扶蘭成枯樹賦吟罷覺心孤

傷鶴

二鶴翱翔離外獵者過以爲可羹也火鎗一發
而斃

奇禍發清流乘軒兩鶴休火攻真下策羽化入高秋小
瘞苔痕薄平沙爪跡留神仙還有劫何處免閒愁

諸知己詩

有序

曹公以太牢祭喬太尉卽宣尼報德之說阿瞞
猜忍猶知此義況君子乎枚少也賤長登仕途
好我者中心藏之今生四十四年矣伏而不

髮有二色所報可知每學張步自呼負負計不
與形骸俱化者惟有文字倣少陵八哀聊志寸
心其他或頌其生或輓其死見集中者不復再
見金公恩最深故重言之生存者溧陽一相而
已疏題之曰諸知己詩

禮部侍郎浙江提學王公蘭生

予幼學典謁觀光逐人走試摘書九千飲水墨一斗奕
奕王交河許作童子郎膠庠騎竹馬觀者嘆道旁蟠桃
花未開春風吹已早秋來寧不實自愧登盤小

兵科給事中浙江提學帥公念祖

杭州蘇司業羣士附如毛非其所薦者竊竊愁琴焦帥

公無先容拔我升前茅按劍對夜光
搢獄出毫曹長安一爲別咸陽萬里
遙青蠅宦海飛白骨沙場拋可憐養
鷺鷥不見賦鵲鵲何當抱孤琴
塞外將魂招公爲陝西布政使
死塞上

處士柴東昇

瀨水一盃飯翳梁一頓餐當時寸心足
此事千古難我昔粵西行助者柴先生
先生非有餘蓮幕分杯羹君家耕南弟
與我臭如蘭以愛及所愛同舟赴高安
富春江水清洪都江月白照我與君遊
照君與我別如何照施恩不能照報德

廣西巡撫金公鉞

中丞巡粵西大阮遊幕中馳書招我往一見呼終董作
奏薦之天署年驚王公詞科三百人爭來趨下風我遊
蓬萊池公歸兜率宮愛我肩宇異期我爵位同語我韜
畧計許我旂常功一事不能副兩淚何由終九原如可
作持面愁相逢

協辦大學士吏部尚書孫公嘉淦

孤鳳蹲青桐不鳴如有聲金鐘懸東序萬物肅儀型孫
公司爽鳩海內儒林亞天瑞五色雲丹青佐神化我來
溫卷時春風吹滿面已助阮修婚更作正平薦登門已
足榮何況噓植之千秋溯淵源大賢爲吾師

大常寺卿唐公綏祖

唐公智勇深高秋懸冰鏡一顧市可空九折臂逾勁賤
子趨末階短衣不掩脛公命下達來平章將女贈我會
訂范雲何敢學子敬緣薄已慚恩福薄更慚命讀祭喬
公文琅琅不忍聽

文淵閣大學士史公貽直

唐時顯慶輅皇宋夸物在一鳳鳴虞廷雍容六十載周
官三百六歷歷皆所司唐區十五道各各駐旌旗開口
姚元之放手杜黃裳瑕瑜不相掩才力堪低昂公以姚
杜兩公
命自奉詔教翰林我擬策一通謂有陸贄直而兼長沙
忠萬金何足感一言長在心仰止一品集封敖涕淚深

編修李公重華

仙人碧虛骨不染明窗塵偶歌梅花詩水絲彈孤雲市
上逢郎君雞壇敦風好門下作門生裴皦臣其笑長安
鳴珂里姑蘇青雀舟夫人行大享內子折花鬻思之如
前生華屋悲山邱

御史王公峻

孤峯生大海四顧全無地志士立中朝寸心惟有帝
先生獬豸冠目作愁胡覩屢請上方劍王孫何自厲愛
我賦秋蘭逢人夸姓氏卿輩縱不聽奮舌行吾意說士
甘於肉排閤時掉臂歸老擁臯比得免魑魅忌千秋寂
寞名表章誰我繼

兩江總督德公濟齋

講學俗儒耳惟公便覺雅爲問所以然一真黜百假宗
藩靜而尊服侍皆宦者赤子心盤旋黃金手揮灑置身
三古前遊目兩廡下排衆用一賢命我擁雙社幸遇朽
木雕擬躍祥金冶鳴呼伯樂去惟悴終天馬

兩江總督策公榜

策公不知書能收英雄才龍泉迎風胡一見心顏開彼
此留不得兩心各自哀賤子還鄉井將軍去輪臺陳湯
誤質子班勇無軍功蛇矛兩手折鐵鎖九天封未獲訊
廷尉先聞劫義公肉飛瀚海草血涼天山風吾欲負馬
革褰骨祭鬼雄

福建布政使陶公士鑽

寸寸離官樂行行驄馬止相逢陶士行苦留王稚子問
公識我歟公云不識君上指丹鳳閣下指黔首民

李名世秀才

我聽深邑訟有客戴儒冠日日立堂下如石點頭看疑
是攘獄者來探鞠刺端覺不干我事姑且聽其然亡何
我改邑驅車出郊外此人伏艸中奔向車前拜云是高
亭人偶來深邑界愛我聽訟明質屋居此間日聽一二
事歸與父老傳我方拱手謝彼復攏袖言餉朱提八流
願當剗寵錢拒之彼淚下受之我茫然從此一爲別騰
身如雲烟感君好善心愧我酬恩意冥冥三十年惻惻
至今記記得門狀書秀才李名世

詩畢後再題一絕

事難如志都歸命詩豈酬恩畧表心回首河山人宛在
相思便作幾回吟

避暑

避暑無他法安身有秘方只離紅日遠自覺碧天涼

起早

起早殘燈在門關落日遲雨來蟬小歇風到柳先知借
病常辭客知非又改詩蜻蜓無賴甚飛滿藕花枝

改詩

改詩難於作辛苦無定程萬謀簪不下九轉丹難成遊
覺後歷妙陣悔前才輕抽絲緒益引汲井泉彌惜健履

絕色顯葉割孤花明如探海嶽勝人到仙不行如奏鈞
天津鳥啞鳳始鳴脫去舊門戶仍存古典型役使萬書
籍不汨方寸靈恥據一隅霸好與全軍爭吹角不笑徵
塗紅兼殺青相物付所宜千燈光晶熒寧亢不願墜寧
險毋甘平動必拔龍角靜可察螭蠅選調如選將非勝
不川兵下字如下石石破天方驚豈敢追前輩亦非畏
後生常念古英雄慷慨爭功名我噤不得用借此鳴劄
鏗盡才而後止華夏有正聲凡彼小伎藝傳者皆其精
奚可聖人教飽食忘經營止怒莫如詩管子歌之可怡
情多文以爲富擁之勝百城既省絲竹費兼招風月聽
上鳴 國家盛下使羣賢賢縱死見玉皇猶能獻韶英

風帆

一葉高懸浪拍天孤迎紅日孰爭先
風非不順吹難飽海縱無邊住有權
力大勝騎龍馬走身閒長抱水雲眠
篙工未肯將君用要等餘皇萬斛船

馬鞭

烟樓撞處久摩空曾記馳驅閬苑東
斜指斷腸雲外樹自鳴得意馬蹄風
隔花傳響春山遠帶雨催程落照紅
一个祖生追不上歸來忍待管絃終

大樹

繁枝高拂九霄霜蔭屋常生頂日涼
葉落每橫千畝雪花開曾作六朝香
不逢大匠材難用肯住深山壽更長

倚樹有人問名字爲言南國老甘棠

古琴

箏琶海內傳新曲禮樂千年剩老身
挂壁尚存清廟夢過時誰奏廣陵春
敢隨武庫爭高價只覺羲皇是故人
我不知音偏好古七條絃上拂灰塵

琴操曰伏羲造琴

夸父杖

八荒霍霍驚仰首空中夸父逐日走
拔山倒海事事終不追白日非英雄
果然手提黃金烏問公此樂胡爲乎
如何口渴顏色槁一枝杖作鄮林草

延陵馬

延陵卓子馭馬猛前有霜刃後有槌
馬行不進斬以狗

馬骨之高與山等伯樂見之泣不止造父之御不如此
天生神駿美且都入公之廐有若無

刑天舞

鸞鳥能歌鳳鳥舞刑天效顰舞更苦左于右戚舞不休
天帝欲笑千靈愁爾力非不大爾心非不賢臣有一言
陳蒼天先賜頭目後賜手俾知好醜能折旋

狄鞮倡

妖嬈狄鞮倡不嫁年少郎不知女誠字幾行但願高車
大馬來煌煌吹笙酌斗烹肥羊豈不懷故夫故夫羅袖
多明珠豈不彈青琴青琴惜惜非妾心豪客愛妾媚君
王愛妾嬌終身不出黃金屋老大還吹白玉簫嗚呼君

不見天邊孤月長門斜絕色湘娥啼暮花

得履詩

山齋失玉履半年爲金明府奚奴攜去醫蘇州
不傳再醫揚州金公廉得顛末遣復故所

飛兒久化采雲輕故劍重聯舊雨情見面儼如遊子返
還家轉使主人驚身行吳市春帆遠夢覺揚州秋水明
想爲林泉緣未斷隨風又到石頭城

屢亡寃雪徒人費璧返功歸藹大夫神物終憑犀照得
奴星不累月明孤果然世有重圓鏡勝使人求別象珠
安得當官盡公等早提塵海入冰壺

刈稻江北作

無端幽人出有似白雲去一笑下空山
書燈照江樹江上青青峯黃昏若驚顧
不道細雨中尚有孤舟渡
兩行聖人爲蘆中窮士寄行行駐風帆
婆娑傍古寺波靜風葉停澗寒水花細
日暮問芙蓉有人采卿耒老農烟中來
牽犢迎田主豐歉各自呈紛紜具雞黍
床前紅葉霜衣上稻花雨四隣無雜聲
農談相爾汝雨多禾生耳田蕪豆落其
且喜土化宜彼黍終離離飲罷瓦盆酒
握別牧童手明年吾再來門前綠雙柳
回船逢中秋天水澄孤清私心念明月
果然東峯生蘭橈駐瓜步錦衾隔石城
清宵不成寐浩歌酬吾情

送竹軒族弟之河南兼簡滑令呂君

吾宗遠行邁霜色淒河梁因依十餘年攜手此華堂詩
書同檢校家事相扶將一朝辭我去蓬矢射四方貧家
養十客九客猶羣翔胡爲我從昆頃刻成參商階下笑
蓉花媚媚泣道旁春榮嫌葉密秋老愁枝傷今我復何
時兩鬢初凋霜豈不願君留彼此看空囊豈不勸君醉
驪歌難盡觴惟有贈一言富貴早還鄉

讀書矜半解往往言多尤遇人無單複如水行膠舟汝
今初涉世韋絃須矯揉行行重自愛毋作高堂羞我有
舊官聲煩君作遠郵寄與呂大夫滑國爲賢侯我有閒
邱園無力起亭樓望汝攜歸資來此築菟裘兩願都能
償老夫復何求但托紅鯉魚寄書碧山秋

捲簾

偶捲北牕簾風吹春色冷一僧一朶雲同上青山頂

哭三妹五十韻

五枝荆樹好忽隕第三枝最是風華質還兼窈窕姿令
儀宜協吉論齒未應衰情以隨有重喪因在室悲鶴鴒
飛竟斷手足夢重追弄藥爭花日將筭未弁時金籠擒
蟋蟀竹馬逐隣兒各踞長松鍛同分野竈炊書燈裁紙
照學舍隔簾窺呵手團清雪當盤筭劫棋關殘春草綠
舞罷柘枝歆貧不爭梨栗惟能啄豆其非魚常作隊似
雁不差池擬續蘭臺史堪刊紫石碑阿兄試京兆小妹
倚門相望信頻穿眼登科代展眉分襟長戚戚聚首更

怡怡至性醇無比多情累在斯一聞婚早定萬死誓相
隨采鳳從鴛逐紅蘭受雪欺踏搖囚素髮顰摘損凝脂
瑱珮嬰兒撒翠釧健婦持螯餘添妙禍嫁後失爺慈捨
宅棲蘭若長齋伴濟尼當官懲婚惡合族笑娥癡婦棄
仍歸矣天高不鑒之已經分破鏡長自奉慈帷紛悅辛
勤侍藥湯宛轉吹呼盧老親伴問字舉家師有女空生
口無言但點頤女一方形勤指矩圖象強摹規水色雲
沉閣山光樹嘯鵬避人常獨坐對影輒連酒豈戀終風
暴常懷其雨思冰心明月見春恨落花知寂寂芳華度
奄奄玉貌移九迴腸早斷一日病難治自覺傷心極臨
危作遠離家貧投賤藥膳壯誤庸醫白下巫陽至揚州

蕩子羈魂孤通夢速江濶送終遲

得信前一夕夢路上與妹如平生歡

錢猶卜靈前帳已披承衾摩瞋目搜篋理殘詩欲止高

堂慟先教私淚垂蒼茫惟有恨啼勸兩難爲苦憶連年

瘧頻勞徹夜支今朝偏送汝他日更呼誰殘雪敲窗戶

悲風動酒卮浮生千古幻哀輓幾行辭盼斷黃泉路重

逢可有期

陶淵明有飲酒二十首余天性不飲故反之作不

飲酒二十首

淵明與劉伶開口不離酒終竟兩人賢果然爲酒否我

自赴華胥不煩杜康引酒味吾不知酒意吾能領

醉鄉去中國不知幾萬里偶一問其津身熱頭痛耳所

以桃源人雖隣莫通使惟有書味甘行行堪沒齒禹王
大聖人先我惡甘旨千鍾與百榼倦勤從此始

客至如春風來者皆入室率性任所言寒暄各一一可
以具雞黍可以聽瑤瑟欲宿卽張燈解吟亦進筆若問
有酒否此事未可必

天地無終極風輪盪不禁不知古人古安知今人今吾
園二三月全家釣水濱彼得此亦喜此失彼亦與適野
獲天趣忘機蘊性真自笑一家人都遊羲皇世儀狄尚
未生何由知酒味

有目必好色有口必好味戒之使不然口目成虛器縱
之使無涯我又爲渠累聖人善調停君子素其位

古皇無史官崑尼不著書古之大聖賢淡淡忘名譽君
看臯夔外傳者爲誰歟文王有多士名姓亦無聞女媧
戲陶土本自難區分我不知有我而又奚云云

讀書息微倦危坐操青琴求靜常反動絃中怪此心明
知非古曲聊復審其音海水飛何處鍾期亡至今借問
聽者誰門外幽蘭深

名教有樂地一誤殊難曉英雄與文人往往託佛老匪
自矜清超卽是貪壽考譬如飲酒人非此難自了吾學
無不窺惟憎二氏書看則縮其額如嗜菖蒲蒹大道有
周孔奇兵出莊周橫絕萬萬古此外皆蚍蜉君請擇於
斯何事更他求

陶令責子詩思多賢者少未免心戚戚借酒解懷抱我
今雙無之陶間亦云好無所藉杯酌匪我求童蒙得姓
三千年未必以我終君看鄧伯道亦得歸邱中
班家有姪好稚齒入椒房自恃君王愛恩如海水長一
朝咏執扇朱顏逐漸凋君王縱復召終讓新人嬌寂寂
長信宮潄潄泣不止初泣爲紅顏再泣爲青史華髮吹
秋風此生長已矣

古來功名人三皇與五帝所以名赫赫比我先出世我
已讓一先何勞復多事平生行自然無心學仁義婚嫁
不視歷營壘不擇地人皆爲我危而我偏福利想作泚
池人陰陽亦相避濯花時雨來彈琴山月至天地亦偶

然往往如吾意

風霽月色明露影蒼苔上幽人清興發杖策成孤往不知所尋誰寫目卽心賞隣人知未眠水面簫聲響

細雨過深竹水影澄空雲不知何處花微香如有聞漸漸春風和時時芳草熏自誓一片葉告知雲中君

我愛王思遠衫服何燦爛過所勿經懷短衣不掩臂又愛桂陽王興到詩酒濃偶意有所廢戚友不相通君去我欲眠君眠我亦去不藉醉爲辭天懷有深趣

躬耕吾不能觀耕園最便水簪叱牛聲土色老農而老農前致詞秋幾求減租我乃備其力以有易所無農夫喜聲有欣欣來負興我亦恣所往看花招其徒春風熏

玉顏秋月澄冰壺旁人誤生疑先生醉矣乎

春陰漏日遲嬌鳥啼花早羣鳥音難分但覺春懷好旣醒復重眠紗窗碧烟曉啼鳥莫相催春夢儂猶少

任事在人後見事在人先以之涉斯世庶幾無尤焉吾年方垂髫早已登賢書三十挂其冠四十白其鬚味早易撤唐遊早易回車一早無不早未知死何如

兒童籠翠鳥朝夕鳴前軒飛者念其朋籠外語殷勤一朝膠絲發以情累其身傷彼鵲鵲智何如精衛仁吾其愧鳥夫斯人吾同羣

形神天所付名字吾自取形名兩無時此身置何所朝見一莖絲暮吟一首詩借形傳我名名傳形不知

嘗讀高士傳過潔亦無聊太谿刻自處生世如鴻毛我
雖不飲酒恰能餉其糟雲閣自層層風裳必楚楚燈圍
花萬重屋聚書千古寄語於陵子君輩徒自苦

夜過瓜州

霜雁一聲語剡江兩岸秋蘆花三十里吹雪滿船頭我
欲乘潮去孤帆夜不收蒼茫雲樹外明月出瓜州

明月

明月乍離海長風吹上天爭光衆星盡受影一峯先水
色金波麗秋心玉鏡圓雙雙木蘭槳搖落桂花烟

哀雨生

并序

甲子分校南閣薦雨卷不傳一松江陳邁晴

太倉吳維鸚陳故宿學榜後作百韻來謁斐然
成章未幾病死吳爲梅村先生曾孫少年玉貌
登癸酉賢書亡何亦死

蓬蓬江南春青青芳蘭枝舉世旣莫採秋風復敗之蘭
敗復何言寸心傷美人美人如明月曾照幽蘭春吳生
華映族弱冠人如玉陳生雲間彥烟霄躋鸞鶴薦君不
識君孤琴彈白雲相感來相訪賞音良不爽忽弱一个
焉天道其如何再聞雙璧想吾淚空滂沱吹花不上天
一墜且黃泉世上我我冠寧如兩生賢

又病

山中蒲柳畏西風白髮催添又幾重病每防秋先自怯

天如成例不姑容詩書暫遠妻孥近膳飲才清藥氣濃
消受名花都有分年年只是負芙蓉

送望山公入覲

九月尚書覲紫宸九重剛下有溫綸畢夔豈爲科

名重

詔本朝滿洲科目惟鄂爾泰尹繼善二人

馬鄂新兼帝室親抗手

侯王俱後輩趨庭公子半詩人弓刀小隊秋郊外笑指
芙蓉殿晚春

少宰裴叔度典試江南事畢登程入山視疾

柴門駐馬日斜暉八座籠街病客聞天上使星尋舊雨
山中孤月照雲同年人少情難捨候送官多手又分

方握子而端將軍制府也

倚榻相迎扶榻別燈窗葉落尚思

贈副主試錢相人先生

種成桃李滿江陰遠訪成連海上琴見刊小君交可想
記同泮水感尤深青雲不改書生面白簡難忘獬豸心
公曾劾兩江制軍黃太保一十五年才一會那堪此後再如今

假山成

三成號昆侖此義本爾雅幽人戲爲之輦石禱初
將地形叅繼用粉本寫高低肯隨人其妙轉在假平生
欽崎心一旦吐諸野微微洞穴明漸漸雲烟惹五嶽走
家中一犂始腕下未晚早扃門慮有飛去者

寄懷望山公

袞衣人去雪飛時一月空山少和詩豈獨忠勲高海內

卽論儒雅亦吾師東南事重回輪早臣主情深下殿遲
寄語梅花緩調鼎孤雲野鶴正相思

不寐

一聲雨聲雞初鳴四更五更天未明羣雞亂啼聲漸迫
紙窗才露東方白病人夢短冬夜長燈花墮几鼠鬪梁
頭自伏枕日自張四十年事如何忘

商丁孫尊歌爲素將軍作

素公雙瞳今罕有辨古器物如犀剖灘池魚馘羅成行
就中商尊尤冠首現身環海東半腰侈口吞舟容一斗
紅韞赤水珊瑚明翠凝碧玉琉璃厚蛟龍揚鱗鳧氏鏹
丁曰孫三字垂垂陰花陽篆淵深雪雷紋雲氣蟠糾糾

黃目睽睽當臍脰飛廉嘖嘖繞腹走想當元女降生商
兄癸婦庚鑄彝白大鬲七個橫廟門典寶一篇陳黼有
滕臣負俎說調羹成湯嫁妹狄作酒或盛蒞鸞彤祭日
或斟雉羹彭鏹叟史官高勢來戢戢稱視尊前再拜手
道是器成永寶用于孫無疆王萬壽三腹有玉盤有銘
同與此尊垂遠久一朝膜畫封河陽白馬人行器不守
麥秀空傳箕子歌銅盤早蝕比千紐三千年過太陰中
不知有周秦更否神物數滿當出世咸陽耕夫傳某某
苔皴土繡形離奇達官蔑視等瓦缶素公一見購百緡
如辨墳羊識土狗召良工某刷作瓶月洗黑雲光照牖
沃丁武丁鑑爽存猶銜花枝香滿口甄邯威斗于尾儀

若數班行都列後我乃撫尊長嘆息世事輸君常八九
面牛之鼎當康瓠折鉤之喙享敝帶人才那得如金銅
長在泥沙不速朽願公愛士如愛尊母使埋淹嗟不偶

輓孫文定公

戊午鄉試座主

黃扉躬佐泰階平星隕中宵樞馬驚青史三朝書行狀
蒼生四海望銘旌殊恩禮自加羊祜溢美入幾累孔明
身後關心房太尉有無遺表諫東征

偽稱一衆
公爲名累

隨園二十四咏

倉山雲舍

小人有老母倉山多白雲奉母居山中板輿常欣欣看
花與山共采藥與山分

書倉

聚書如聚穀倉儲苦不足爲藏萬古人多造三間屋書
間藏書者幾時君盡讀

金石藏

不見古人面須見古人手廣搜金石文歐趙所未有何
物爲之鄰瑣琬尊彝白

小眠齋

秋齋號小眠空廊無響屨讀倦偶枕書書痕印滿頰不
知牕外花飛過幾蜩蝶

綠曉閣

朝陽耀高閣萬綠一齊曉虛窗聚景多宿雲出簷早翠

微西山低白塔東城小

柳谷

宅西顏柳谷義取尚書詞未必康成識差免虞翻纖春
痕搖水痕滿池如漚絲

翠玉山頭

梅花襟玉蘭排列西南峯素女三千人亂笑含春風我
記相別時瑤臺雪萬重

竹請客

盧仝所思客乃命竹竿請何繇知非僕長教此君等美
人來不來立斷風雲影

因樹爲屋

銀杏四十圍葉落瓦無縫主持小倉山惟吾與汝共更
借屋上蔭招宿丹山鳳

雙湖

我取西子湖移在金陵看時將雙鏡白寫出羣花寒前
湖健荷葉後湖多釣竿

栢亭

種栢成一林屈折爲庭宇奚須文杏梁已遮碧瓦雨翠
禽居之安日坐亭中語

奇礪石

到公有奇石曾向華林補千年幽人得風月一齊古當
作石交看摩挲日三五

回波間

不放流水流清池嫌太滿常放流水流新荷尚嫌短建
開唱回波勸水行緩緩

澄碧泉

山頭峯百層山下泉一尺葉落水面青月落水光白此
水淡無言泠泠終日碧

小樓霞

萬事不嫌小但問能成家我有一間屋公然類棲霞絕
壁屋前山天香屋後花

南臺

築臺望雲物雕欄盡南向天空星可摘木落山獻狀露

葉如水明前峯新月上

水精域

玻璃代窗紙門戶生虛空招月獨辭露見雪不受風平生置心處在水精域中

渡鶴橋

白鶴欲過湖照水不得路十月與梁成羽客含蘆渡新霜鋪玉勻何人試初步

泛杭

不負一池水招招學舟子君覺歌口香知在藕花裏畫橈莫蕩公水動鴛鴦起

香界

小倉山房

卷十五

五

佛家有香界旃檀焚諸天我家有香界幽蘭種溪邊能
聞而知之鼻在耳目先

盤之中

盤意取屈曲旋轉無定區我意亦倣此乃築蝸牛廬紆
行勿直行公等來徐徐

嶺山紅雪

王母宴瑤池蟠桃開似海酒罷落花飛散作諸天彩造
屋居其間紅顏長不改

蔚藍天

琉璃付染人割取青雲片終朝非采藍彷彿天光現客
來笑山驚都成虛杞面

涼室

避暑如避客一室陰悄悄高梧拒日多曲澗引風早
熱中人偶來也覺此間好